

雪橋詩話餘集

靈樞計篇卷一

一

雪橋詩話餘集卷第八

遼陽楊鍾義撰集

吳興劉承幹參校

峻亭大令德玉甲辰進士嘗宰乳源工畫山水方子箴
謝其贈畫詩云我聞蠟嶺之高高插天西京孔道闢在
東嶠前山深不化太古雪門戶險絕推騎田或云藍關
卽此是駐馬共說昌黎賢往者入粵庚申年徑思買勇
凌其巔三瀧飛渡那得泊至今神往雲門邊得君畫圖
令我動豪想何時芒鞋竹杖蘿葛偕捫攀鯁生目不辨
六法但見淋漓潑墨一氣成蜿蜒胸中無限邱壑蟠筆

如巨斧擘破青巘屹置身疊嶂層崖間

鳳臺苗沛霖假團練爲名樹黨自固擢監司卒以叛
誅方子箴苗先生一首紀其事也八公山下風怒號東
臺湖畔排旌旄愁雲黯淡日光冷築壘三面穿長濠孤
城直等亡羊牢稱戈比干苗先生先生出師名無名繡
衣持斧非不榮青衿得之呀然笑崎嶇蜀道吾難行鳴
呼讀聖賢書學何事號召子弟假仁義螳螂捕蟬黃雀
伺林鳩借居蟲亦寄漁翁巧收鷸蚌利先生一鳴驚將
帥富貴功名乃立致僉曰先生無異志先生橫行淮以
南藐兔趯趯貪狼貪虎欲逐逐視耽耽蝸國蠻觸揮矛

燄勤王有命從天下倒戈相向氣凌跨前年尋釁入壽
春手縛大吏代乞恩睚眦已報私怨伸跋扈公然森羽
鱗先生通賊復賣賊首鼠兩端心叵測舉止依然窮措
大談兵實滅英雄色雷霆赫赫揚天威紛紛兩檄來合
圍名王東下萬馬肥貳師將軍偕指揮況有韓范嫻戎
機網羅四布奚能飛血雨徧灑渦潁淝吁嗟我爲先生
危先生至此將安歸井蛙籬鷄從古皆如斯

吳穀人祭酒館阿文成家最久文成逆知將考試翰詹
於前二日索書小楷扇面促其速成穀人漠然不應迨
大考後一日始書以奉文成而試卷已爲某相國抑置

三等矣主講梅花書院時適那文毅奉使浙江道經揚
州詢近況但言文字之樂迨至浙公事畢過先生之居
夫人出見始告以家無恆產脩脯所入不足供薪水使
先生早與文毅謀之揚商得使者一言重金可立致也
方子箴詩有云久聞黃閣禮鄒枚造就天家柱石才賓
館遲遲書便面神仙幾至謫蓬萊囊橐蕭然國子師挂
冠江上擁皋比西冷老屋荒寒甚猶似當年未遇時
鄧彌之哀臨川弔林司馬源恩云芒星睽睽破月入迴
沙漠漠元雲溼帳前朔氣干將鳴夜半陰燐鬼雄立饑
久絕粒臨川軍因糧苦道分屯急兵符一點疾不收百

里馳呼豈相及霧映城南角聲起飛燧照江流水力
戰三時日半晡白桿縱橫蔽殘壘林公耿介當營立腰
間劒光冷如洗刃摧弦絕一再麾五百健兒盡迴指悲
風一騎唐侯來寶刀突兀煙塵裏授公以策公弗回慷
慨坐地泣不止由來重義豈顧身猛氣雄姿爲公死殘
卒抱鞍哭向天唐侯汝亦真男子當時眉骨皆爾曹江
上諸壁寧至此昌江部曲見者愁裏瘡涕面訴道周惜
公抵死空斷頭蒿陂雨黑魂呻吟嘯鵑啄骨聲颼颼安
得起公領貔貅往集餘燼剪我仇掩袂東望徒繁憂司
馬蜀之安縣人從曾湘鄉九江軍丙辰李次青攻撫州

司馬及彌之領平江軍自南昌來會連克進賢東鄉遂
圍撫州七月彌之中讒謝去九月司馬與耿光宣戰歿
都司唐德陞以十五日來援十七日同及於難戊午官
軍克復撫州又明年湘鄉爲立林君殉難碑記焉彌之
是詩己未隨大軍駐臨川作也

彌之嘗將湘軍援浙官
道員以人言罷歸晚客

江寧主文正
書院癸巳卒

陸秀山院判萬成

一名毓成

吳人父國棟守慶陽因流寓秦

中少學醫得葉天士之術道光初從楊忠武於西陲當
得守備辭不受年逾七十以訪友至京師咸豐庚申夏
文宗特召入用藥與御醫不合 上頗遲疑秀山叩

頭言服民藥不效則殺民服之 聖躬愈賜六品服爲
太醫院判伏謝不習仕宦許就虛銜有子方候選或謂
不爲子丐恩笑不答出入禁闥值天津告警 上語及
之率爾而對辭甚慙爲之動色被遇殊異意氣夷然如
平日全州蔣申甫贈以詩云著書遠欲紹忠州晚節高
同黃綺儔言可養生技進道貧而逃仕樂忘憂古來國
手秦醫緩今見山人李鄴侯帷幄也應同苦口扶危何
以副旁求申甫尹京時曾有所陳庚申夷警時釋服未
除職抗疏請幸三晉固根本格不及上則單騎度太行
欲糾守臣故相爲迎鑾之舉事竟不果雅重秀山之爲

人往還甚密是年年盡重相遇於長安蓋不勝天涯今昔之感也

同治紀元蔣申甫京兆僑居上黨馳進中興十二策已而陳情乞養居衡永間以老善化張伯輿懷舊詩芝城山色寓公居垂老扁舟返舊廬四海猶傳師弟疏中朝不答友朋書江穿粵嶺孤城失天入蒼梧落照虛雲裏數行知已淚何堪南望灑邱墟四海句謂王子壽比部同時應詔陳言其甲辰所得士也

小田大令肅慶知隆昌咸豐庚申帶勇禦賊勇潰陣亡沈意文詩鄰有寇城有防藉民力籌勇糧縣官忍坐視

帶勇先擊賊賊來勇先奔官死盡其職君不見將官帶
勇不出城華衣繡纛街前行夜涼帳下聞歌聲

江夏彭薑畦瑞毓家本溧陽爲司空會淇五世孫王子
傳臚丙辰入直南齋丁巳宴同樂園 穆宗甫逾晬盤

文宗命出見焉戊午典試山右遂留督學王子壽序
其賜龍堂集謂詞章俊麗才不爲遇所掩辛酉冬由晉
回京不見召遂以京察出爲雲南副使曲靖中秋對月
云五十八度中秋夜人與月圓有幾回屈指三時強半
去隻身萬里爲誰來邊聲動地無弦管清淚臨風入酒
杯信是宦游多別恨玉叢珠幔未應開其有玉堂天上

之思乎

江都符南樵孝廉詩多悽愴之音己未下第出都云雙
輪一出萬回環日碾黃塵那得閒身世茫茫生白髮江
湖去去看青山縱橫敝篋風雲氣開落名花涕淚斑極
目西南尚烽火諸公何日靖羣蠻時戊午科場方興大
獄第三聯有爲而發也

泗州傅梧生因人遠客久滯陪都游千山途中偶成云
寸寸湛寒碧奇雲天際濃霜嚴彫百卉雨霽出千峰馭
氣猱生捷梯空鳥道重寺門何處覓遠聽上方鐘其千
山松歌敘云遼陽州南六十里有千山合沓深秀邱壑

特美羣峭蔚跂森嶠如屏護如星羅毛西河云志載九
百九十九峰因千名而山之勝尤以松飛榮竦翠石質
松文或峰厝於喬林或谷嘯於爽籟信沈冥之窟宅運
仙都之妙有者也昔孫興公以馳神運思謂天台儼若
再升況余晨策夕憩散懷于茲山獨可以無言乎哉龍
泉寺西閣云茲山信幽藹一掩復一重水細落深澗逕
轉迷來蹤積以巖巖石覆以蒼蒼松松石爭攬天一氣
青濛濛桀閣西爽挹闌檻憑高空兩腋生羽翼真想初
在胸浩如汎虛丹霞舉濤浪中會有仙之人飛躋長相
從龍泉西閣前有石一本高可十丈許從巖底陡立上

與檐齊石頂松柏數株蓋千百年物偃蹇蒼秀埒石四
垂森然有致洵洞天無上品也梧生因用昌黎山石詩
韻賦之登五佛頂同周大詩敘云頂爲千山最高處上
御闔風下臨重淵登者背逡巡足二分垂在外至峰轉
逕絕有高松直倚頂下枝橫出若梯欲陟頂者援而出
蓋所見逾奇逕逾險游蹤能至鮮矣往往有賈勇來登
方躡危磴數武便喘嘶汗出股栗眊眩須扶掖乃能下
自余與周大登後述之山僧僧謂在山三十餘年從未
一登因題詩寺壁以諗來者願作導師詩有縱望閭陽
三百里醫巫眼底小于拳之句洵壯觀也

國初嘉興諸生馮文昌研祥有宋槧金石錄刻一圖記
曰金石錄十卷人家嗣爲儀徵江立玉屏所有因以題
其齋張燕昌爲用飛白書刻印以贈後歸趙魏晉齋繼
爲阮文達所得自撫浙至入閤恆攜以自隨翁覃溪詩
阮公積古邁歐趙蘇齋快與論墨緣恰逢葉子仿篆記
宛如舊日馮家鐫葉子篆樣又摹副其一畀我蘇齋筵
韓泰華小亭得之亦刻金石錄十卷人家小印復歸潘
鄭菴師嘗倩人作拜書圖師圖書金石甲吳下每觀一
書輒爲解題成滂喜齋讀書記二卷藏古器六百餘品
孟鼎克鼎齊侯罇其最著者有攀古樓彝器款識其漢

夏承碑梁永陽王蕭敷及敬太妃墓石皆孤本漢沙南
侯獲石今拓僅存三行師得舊拓本另有字三行因句
刻并爲攷釋一卷庚寅霪霖爲災以兼尹籌振濟十月
薨於位饑民聞赴皆號泣出殯日夾道爭奉麥餅果餌
李愛伯詩百輩願當京兆死九原猶爲澤鴻哀紀實也
仁和胡心耘博士珽居吳門以活字版印琳瑯祕室叢
書葉潤臣賦四絕句云江關兵氣劇堪哀井邑蕭條幾
劫灰吳下有人能好事三千里外載書來豔說詩人鮑
夕陽當年姓字動天閭期君努力收奇祕莫使斯文付
散亡米貴長安不易居還家何處構吾廬謀生拚笑儒

冠誤尙乞琅嬛未見書宋世文章重石林遺編今日費
搜尋因君問訊調生叟清露研朱百代心心耘少孤母
蔣氏保守遺書俟其成長而授之咸豐癸丑上海城陷
吳中遷徙殆盡心耘閉戶修書與若生最爲同調其叢
書四集三十種首列東家雜記旁及百家足稱好事潤
臣旣殫心耘爲排次遺詩朱伯韓怡志堂詩編亦心耘
排印庚申避亂滬城辛酉卒年四十

鄭蘭坡中丞瑛棨以陝撫獲咎光緒初起用秉臬山西
閒居時好於廠肆搜羅書帖翁瓶廬師題所藏懷仁集
書聖教未斷本云墨花膩帶古苔痕切眼珠光未易論